



Fasnacht 2024
Waageglygge Vorstadt-Glunggi • Binnige

Us Draditjoon wiird Gier!

Dr Knorli mit dr roote Kappe duet syt 75 Joor verzelle
me ziet bim Koche gwiss kai Schlappe, sy Allzwägg-Gwiirz wuurd sicher stelle.
Die ganz Natioon streyts uff kochti Aier und aller Gattig anderne Spyse,
au im Feeriegpägg all Joor derbyy, suscht entstoot e mittleri Familiegryse.
Bi fiirnääme Gsellschafte duet me s gsee ooder dehaime ganz brivaat
verzichte druff duet fascht kaine mee, uffs goldige Bulver Aromaat.
Syt Generatioone scho gheerts fascht uff alli Gricht
und mutiert zuur Schwyzer Kultuurguet-Gschicht.
Aaber langsam schmilzt uns s Kultuurguet ewägg,
wie alli Gletscher ooder dr Permafroscht
und Groosskonzäärn soorge sich e Drägg
miir finde das ganz diggi Boscht!
E Schoggi verliert sy Matterhorn, aaber bhalter syni bruune Zagge.
S Rezäbbt dervoò bikemme die fimpfmoò billigere Slowagge.
D Binggis schlotze faarbigi Sugus scho lang fabriziert vo de Franzoose
und butze speerig iiri Raffle mit Elmex importiert uss Poole.
Buechsch Fluugifeerie mit dr SWISS, duets dy schampaar scheen verbloose,
wenn amänd e Schwoobe-Clipper di mit Verspeetig kunnt go hoole.
Kultobjäggt us erfolgryche Zytte geen als immer wie mee verlore.
S wiird in dr Fäärni billigscht produziert
und d Verbruucher doo faadegraad gschoore.
Velicht mien mer ebbis doo rasch richtig stelle
me deerfs um himmelswille nit lätz verstoo.
Was mer in aifache Woort doo saage welle
es goot nit ewägg, es isch aifach nimm vo doo!
Aaber duet ebbis zweenig Bulver yybringe,
springts in unserem Land grad iiber die schaarfi Klinge!
Dr gytig Wuntsch nach mee Brofit isch als wie mee ganz geegewäartig,
adjee «Swissness» ka me weemietig saage,
mer stumpfe bachab, verliere d Äärdig,
wie lang ka s d Wiirtschaft no erdraage?
Ai Liechtbligg wiird uns aaber doch no gloo.
Ains blyyb in unserem Ländli ganz sicher bistoo.
Als Nationaalspoort männgs Joore scho etabliert,
wo Fremdi ganz sälte ooder gaar nit kapiere,
wenn greftigi Gstaalte sich ganz unschiniert
ruggsyts ins Säägmääl dien katapultiere.
En Alldaagskultur no us frienere Zytte,
gseet me jetze alli Gwichtsklasse jeedes Bäärgfesch bestrytte.
Männgerlai Fans gits deert z bestuune,
sii fille d Areene scho demoorge frie
und verfolge zämme in beschter Luune,
wie schwungvoll sich die Bregge am Zwilch dien ummezie.
Als hellschi Keerze uff ere Doorte sind sii zwoor nit esoo bikannt
aaberg e Gattig mache sii an allne Oorte, wo ainzig isch im ganze Land.
Wenn die Beese am Hooselupf-Duurnyrr iiri Händ geegesytig dien raiche
finde mir das eedelschi «Swissness», woo me nimm ka besser braiche!
Nooch em ESAF z Brattele het me um Millioone grunge
gaar zimpftig het d Infrastruggdduur s Budget gspränggt.
Mit eme diräggte Wuurf ischs dangg Sponsoore no glunge
ass dr Kanton kaini heechere Styre verhänggt.
Entfäärnt esoone Fescht sich vo uurchiger Draditjoon?
Rambasse geege Metzger wiird uns glaubhaft suggeriert.
Doch Granzschwinger sind Broofispoortler hooch uff em Droon,
wiird doo au scho alles voogelfrey iiberkommerzialisiert?
Die Lingge dien d Alaarmaane hooch hisse,
die Rächte wurde die Blattfoorm bruuche um uns uff iiri Sytte z rysse.
Au ganz gytig ooder gierig – wie d Schwoobe das benamse,
hänge EU-Uflaage schwer in helvetische Oore.
D «Swissness» fliegt ewägg, wie im Herbscht au alli Amsle.
Numme die kemmen im Frielig wiider zrugg, aaber d «Swissness» isch verlore.
E Muuni, scheeni Traichle, amigs e Schnupf zem Inhaliere,
s schmeggt nach Brootwurscht, Moscht und Kaffi-Schnaps.
Uurchigs, wo me nit aifach ka expoortiere, bhalter bi uns aaber sy feschte Blatz.
Uff dr Waage-Areena schwinge mer dissjeerig umme
und hänn e Granzfesch wie am Brünig ooder z Unspunne.
Als Schwinger-Waggis-Hybride blybbe baidi Draditjoone nit verboorge
und um e «Swissness»-Faktor mache mer uns no kaini Soorge.
Schwinget au mit, dien mer diffig abbelliere,
an Bolitygger, Verbruucher und die woo s wänn no brobriere.
Mee «Swissness» isch gfroggt und wäärschafti Gwaalidäät!
Verlieret dr Boode nit, kemmet zrugg zuur Realitäät!
Voll und ganz sotte mer uns däm doch verschrybe
ass scheeni Draditjoone unändlig lang erhalte blybe.



D Ladäärne-Uusstellig uff em Minschterplatz und d Waage- und Reggwisyte-Uusstellig bi dr Kasärne sin vom Määntigznacht bis am Mittwuch demoorge! Deert und an de 3 Verkaufsständ (CINS) in dr Stadt ka men au alli Zeedel und Schnitzelbägg, d Blaggedde und dr Rädäbägg kaufe.

www.vorstadtglunggi.ch

Drugg: Tanner & Bosshardt AG, Basel